

Schee wärs trotzdem

Om Sunndaachmoie habb ich mett moim Kumpel Schorsch om Moo gestonne, doo stummpst der mich oo. Honnes, hosde dess Spill geeche die Schwede geseh? Honnes, mir werrn Weltmeister!

Ich habb gegrinst. Schorsch, villeicht. Dissmol hott die Monnschaft dess gemacht, was ich schunn immer vorm Fernseh gerufe habb, ohne dass die mich geheert hädde. Vorne isses Door, habb ich immer gerufe. Waaßde dess noch?

Ei klar, gibt de Schorsch zur Antwort, unn ich waaß aach noch was ich dann gesacht habb. Honnes, habb ich gesacht, du host zwar koo Ohnung vom Fußball, awwer doodemett hosde Recht. Awwer saach doch emol, was hälsden doodefoo? Doo hott unser Fußball-Monnschaft grad e paar Mol gewunne unn mir Deutsche hawwe uns driwwer gefreut, hawwe aach Fähncher onns Audo gemacht unn die Nationalhym mett-gesummt – unn schunn gibts so e paar Bonze, dene basst dess iwverhaupt nit.

Ich saach: Du moonst bestimmt die von de Lehrer-Gewerkschaft, dene dess bisje Nationalstolz, was merr grad zeiche, schunn zuvill iss, odder?

Ei klar, moont de Schorsch, unn wennde heerst was die ferr Ausdruck hawwe! Als ob die Nationalhym von de Nazis erfenne worrn wär, doodebei iss die doch vill älder, wie ich gelese habb.

Ich habb de Kopp geschittelt. Von wonn die iss waaß ich nit so genau, awwer dass nit von de Nazis iss, dess waaß ich. Josses naa, statt dass die Leit e bisje singe unn sich freue losse, unn dass mol froh sinn dass aach mir e bisje stolz uff unser Lond sinn, krätsche se doo rum. Weil mir Deutsche hädde so vill Dreck om Stecke, dass merr deshalb schee unser Maul halle solle. Unn nor zugucke solle, wie Italiener, Fronzose, Engländer unn Koreaner ihr Fähncher schwenke.

De Schorsch hott noch was gewusst. Debei sieht dess doch klasse aus, wenn die Leit sich freue, egal obse Deutsche odder Ausländer sinn.

Ich habb genickt. Du glaabt garnit wie merr dess gefalle dut. Unn wenn mir doo so richdisch mettmache, dann sinn so vill Leit aus onnern Länder hier bei uns, die lerne uns emol vonnere gonz onnern Seit kenne. Dass merr nämlich nit so stur und zackich sinn wie merr uns monchmol noochsaache dut, naa, dass aach mir uns grad wie onnern Natione aach so richdisch freue kenne. Doodebei isses im Aacheblick doch werklich egal, ob merr Weltmeister werrn odder nit. Ich glaab, wenn merr schee spille unn verliern, dann gucke merr genau so gern dene onnern Monnschafte zu, die noch im Turnier sinn, odder?

De Schorsch war doodefoo nit so begeistert. No ja, awwer schee wärs trotzdem, wenn merr e bisje weiterkumme dete, odder?

Ich saach: Klar wär dess schee, awwer villeich lerne mir joo all was von dene Fußballer. Dass die onnern gut sinn, awwer mir aach. Dass egal wo die Mensche herkomme jeder ebbes hott, was gut iss unn was merr sich abgucke kann. Unn dass merr von de onnern was lerne kann ohne dass merr sich kloppt odder große Sprüch mächt. Unn dasses besser iss sich oozestrenge unn ze renne als sich hiezestelle unn ze jammern. Dass merr sich uff soi Kraft besinnt, nit hochnäsich iss unn trotzdem waaß was merr wert iss. Weil die onnern dess aach von sich wisse. Unn wenn merr dann noch lerne, dass mir unsern Platz in de Welt hawwe wie onnern aach, dann war die Weltmeisterschaft in unserm Lond nit verkehrt gewese, egal wie se ausgeht.

Eiern Honnes